

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 74, No. 1492

原始資料: CBETA 人工輸入, CBETA 掃瞄辨識

No. 1492

禮佛儀式(或晝夜六時或日三時或晨昏二時)

廣州南海寶象林沙門 弘贊 編

(今時禮拜多乖儀則。不符教旨。或稱名失次。而罔諳稱揚讚歎佛之勝德。或欠存敬。而不知懺悔發願迴向。若不解法。何由捐埃獲福。以招極果。故經論俱陳五法。而深尚禮敬讚德。先須至於香臺。端身息慮。思念聖德。目覩尊容。雙膝著地。手擎香爐。而舉偈言)。

戒香定香解脫香。光明雲臺遍法界。供養十方無量佛。聞香普熏證寂滅。

(此偈出華嚴經。是五分法身之香。今為成頌。故文略慧香解脫知見。香。香為佛使。故先獻之。或如常香花雲偈。亦得但改云。及諸獨覺仙。若有鮮花。即用擎以供養)。

○普禮三寶

(先當讚德。隨禮何佛菩薩聖僧。依德而讚。然其讚詞。可取諸經論中偈頌。以為申歎。若其讚詞。不稱人稱德者。方可依經旨自述偈讚。今略取賢聖所集一百頌偈。以讚三寶。又凡為禮拜。必須先敬三寶。三寶是最勝吉祥。良祐福田。能消眾生業垢。却諸魔障。所作善事。皆獲成就也。讚佛云)。

稽首一切出世間。三界最尊功德海。智者能燒煩惱垢。正覺我今歸命禮(若能誦禮佛滅罪呪。然後禮之。大善。呪曰)。

娜謨達奢(書何切)那[合*牛](一) 菩陀俱致那[合*牛](二) 烏[合*牛](三)(二合) 戶嚕戶嚕(四) 悉馱嚕者儻(五) 娑囉婆囉他(六) 娑達儻(七) 娑婆訶

(寶幢勝經云。此呪十俱致諸佛所說。我今亦為憐愍一切眾生。持此呪者。能令一切嗔惡眾生。悉皆歡喜。若能日日三時誦呪禮拜者。勝禮千萬俱致諸佛功德。命終之後。得生西方無量壽佛國。又云。臨命終時。得諸佛來迎。未來賢劫千佛。一一皆得親承供養。但有人能常誦此呪者。最是不可思議也)。

一心頂禮十方三世一切諸佛世尊(須五體投地。兩手迎空。示接佛足之相。乃運想云。能禮所禮性空寂。感應道交難思議。我此道場如帝珠。十方諸佛影現中。我身影現諸佛前。頭面接足歸命禮。若禮本師應云。釋迦如來影現中。禮餘佛菩薩聖僧。準上應改。讚法云)

稽首能拔生死險。普竭憂惱貪癡海。破彼塵勞罪業山。我今歸禮妙法寶。

一心頂禮十方三世一切尊法(想云。真空法性如虛空。常住法寶難思議。我身影現法寶前。一心如法歸命禮。讚僧云)

稽首一切佛稱讚。八正萬行作莊嚴。無為定慧漸圓明。我今歸命聖眾寶。
一心頂禮十方三世一切賢聖僧(運想準前。此中讚禮。兼大小乘僧)

○禮釋迦世尊

(讚詞。或以天上天下無如佛偈。或用如來妙色身讚。皆可。西國禮敬。盛陳讚頌。如尊者摩啞哩制吒。承佛先記。造四百讚。及一百五十頌。總陳六度。明佛勝德。文詞婉麗。理致清高。無著天親。馬鳴大士等。咸皆祖習。初學者。不可不知。如來金身丈六。三十二相。八十種好。身光一尋。眉間玉毫。遍照十方。如方等經。華聚菩薩讚佛偈云)。

世尊色身如金山。猶如千日照世間。能拔一切諸苦惱。我今稽首大法王。
一心頂禮本師釋迦牟尼世尊

○禮彌陀佛

(華言。無量壽佛。如觀經云。阿彌陀佛。身高六十萬億那由他恒河沙由旬。眼如四大海水。玉毫如五須彌。身光如百億三千大千世界。然此非凡夫心力所能及。以佛力故。憶想必得成就。但想佛像。得無量福。況能觀佛具足身相。或即作丈六身觀。亦得)。

眾德嚴身非數量。光明遍照過十方。三世如來無與等。恒施眾生大慈航。
一心頂禮西方極樂世界阿彌陀世尊

○禮彌勒菩薩

(若據當來人壽八萬歲時下生。佛身高三十二丈。詳如下生經說。若準現在兜率天身。則大士色身長十六由旬。相好如佛。其天寶冠。有無量化佛。諸化菩薩。他方諸大菩薩。住天冠中。若一念頃。稱彌勒名。除千二百劫生死之罪。但聞名合掌恭敬。除五千劫生死之罪。若禮敬。除百億劫生死之罪。如上生經說。讚云)。

大士久成等正覺。成熟有情居兜率。晝夜常轉不退輪。龍華三會度無極。
一心頂禮當來下生彌勒世尊

○禮文殊菩薩

(此菩薩。具大智辯。法王之子。諸佛之師。示童子相。頭有五髻。身紫色。著寶瓔珞。坐寶蓮華。云坐獅子者。表菩薩說法如獅子吼。百獸潛踪。瞻部洲中。一切眾生。皆蒙菩薩德護。不可不知。若一稱名。滅無量罪。長無量福。當來成佛。號普現如來。讚云)。

三世如來之導師。智願廣大難思議。無邊剎海為國土當來普現善逝尊。
一心頂禮大智文殊師利菩薩摩訶薩

○禮普賢菩薩

(具大行願。為諸佛長子。頭頂花冠。身披瓔珞。坐寶蓮華。或乘六牙白象。以表六度萬行。若歸依普賢菩薩。則十方諸佛菩薩。悉皆加護。以諸佛菩薩。皆因修三密門。行普賢行。得證聖果故也。讚云)。

六牙白象為寶座。諸度萬行作嘖呻。華藏世界稱長子。十方剎土現全身。

一心頂禮大行普賢菩薩摩訶薩

○禮觀自在菩薩

(此菩薩。過去已成佛。號正法明如來。今現為極樂世界補處菩薩。當來補阿彌陀佛位成佛。

號普明高顯吉祥峯王如來。但于此界眾生有緣。現三十二應而為教化。本身紫金色。長八十萬億那由他由旬。頂有肉髻項有圓光。光中有五百化佛。五百菩薩。舉身光中。五道眾生。一切色相。皆於中現。頂上寶天冠中。有一立化佛。高二十五由旬。眉間毫相七寶色。流出八萬四千光明。譬如紅蓮華色。有十八億妙光以為瓔珞。掌作五百億雜蓮華色。十指端。有八萬四千畫文。光明柔軟。普照一切。以此寶手。接引眾生。如此菩薩。但聞其名。獲福無量。餘如觀經說。或不能作是觀者。隨心大小。亦得。那由他者。萬億為一那由他。四十里為一由旬。百億為一俱致。讚云)。

寶冠頂佛因帶果。過去法明天人師。悲願運為千手眼。照護羣生不失時。

一心頂禮大慈大悲觀世音菩薩摩訶薩

○禮大勢至菩薩

(此菩薩。身量亦如觀音。舉身光明。炤十方國。有緣眾生。皆悉得見。以智慧光。普照一切。離三塗苦。得無量力。故號大勢至。天冠中有五百寶華。一一華有五百寶臺。一一臺中十方諸佛淨土。皆于中現。肉髻上有一寶瓶。盛諸光明。普現佛事。餘如經說。讚云)。

頂上寶瓶現佛事。一毛孔中見十方。舉足震驚諸國上。普攝淨人歸樂邦。

一心頂禮大勢至菩薩摩訶薩

○禮地藏菩薩

(此菩薩。身相端嚴威德殊勝。唯除如來。普賢觀音等。無能過者。又于此界所有教化。亦除普賢觀音等。諸大菩薩。皆不能及。久已獲一切智海。功德滿足。現化十方。以本願力。於五濁世。化益偏厚。速滿一切眾生所求。滅諸重罪。除諸障礙。現得安隱。若禮一拜。一供養者。滅無量罪。獲無量福。讚云)。

悲願初從救親起。分身徧度孰能量。地獄未空不成佛。我今稽首大誓王。

一心頂禮地藏菩薩摩訶薩

○禮虛空藏菩薩

(此菩薩。身披瓔珞。頂上華冠中。有青色摩尼寶珠。若觀此珠。則滅無量罪。除無量障。故修懺中。以此菩薩為滅罪主欲求辨慧。如虛空藏經說。讚云)。

頂上寶珠青光耀。滅除眾生罪如空。我今稽首懺摩主。三障頓消福慧融。

一心頂禮虛空藏菩薩摩訶薩

○禮迦葉尊者

(總持論藏。善於訓導。宰任弘綱。行十二頭陀。行身相金色。如來以正法眼藏而付囑之。讚云)。

德相端嚴如金聚。頭陀苦行自終身。親傳如來正法眼。雞足山中待慈尊。
一心頂禮大德摩訶迦攝波尊者

○禮優波離尊者

(統領四眾。善解毗尼藏。持律第一。是阿難尊者上座。故在先禮之讚云)。

得度身先八王子。楞嚴會上證圓通。弘揚律教毗尼藏。佛法由斯住世隆。

一心頂禮大德優波離尊者

○禮阿難尊者

(總持經藏。親事如來。多聞第一。是如來從弟。身具三十相。讚云)。

多聞眾中稱第一。證道身離四威儀。結集如來正法藏。永作人天度世師。

一心頂禮大德阿難陀尊者

(如上各各一禮。三禮彌善。若更禮餘佛菩薩。或十拜百拜。各隨自意)。

○五悔法

(一禮敬。二懺悔。三隨喜。四勸請。五發願迴向。如彌勒所問經云。佛告阿難彌勒菩薩。本求道時。不持耳鼻頭目手足身命珍寶妻子國土布施。以成佛道。但以善權方便。安樂之行。得致無上正真之道。何為善權方便。彼晝夜各三時。正衣束體。下膝著地。向十方佛說言)。

我悔一切過 勸助眾道德 歸命禮諸佛

令得無上慧

(悔過者。謂懺悔無始時來。身口意所作一切諸惡過失也。勸者。謂勸請十方一切菩薩未成佛者。願速成佛。已成佛者。願常住在世。轉正法輪。莫入涅槃。利樂有情也。助者。謂助喜一切凡聖功德。於十方界。一切眾生。永捨嫉妬之心。其有修學一切功德。乃至一毫之善。我今悉皆助之隨喜也。歸命者。謂舉自身命。歸依諸佛。即是以剝塵身。而徧禮剝塵佛也。令得無上慧者。謂以上四種功德。及所修一切之善。願悉迴向。施與一切眾生。同圓無上種智正等菩提也。凡為懺悔發願。不出此之五法。然諸經俱陳。但彼文廣。此文略耳。如大金光明經。及行願品詳備。若樂廣者。自當檢閱。次當代君親等。致敬三寶)。

一心奉為天龍八部護法聖眾。頂禮十方常住三寶(祝曰。惟願天龍八部。增益威光。擁護正教。四眾安和。離諸魔障)

○
一心奉為國皇大臣宰官護法檀那。頂禮十方常住三寶(惟願皇圖鞏固。帝道遐昌。文武祿增。興隆三寶。玉燭常調。士民樂業。檀那衍慶。不逢三災八難。至成無上菩提)

○
一心奉為所生父母。頂禮十方常住三寶(惟願二親增崇福壽。智慧圓明。若過去父母。神超淨土。業謝塵勞。蓮開上品之華佛授一生之記)

○

一心奉為和尚阿闍梨頂禮十方常住三寶(惟願和尚闍梨。四大安和。壽齊法身。福智增崇。普利一切。若過去者應云增崇品位)

。一心代為末法四輩弟子頂禮十方常住三寶(惟願四輩弟子。善根永固。進道無魔。速證無上菩提)

。一心代為法界眾生頂禮十方常住三寶(惟願法界有情。一時同得阿耨多羅三藐三菩提。此中或增或減。或更有餘願。隨自意發之。茲不繁述)

。

○附寶積經(彌勒菩薩所問會)

(上五悔偈文略。恐哀懇之情不伸餘經文復過長初學難誦。今附寶積經偈。長短得中。以便持誦)。

佛告阿難。彌勒往昔行菩薩道。晝夜六時。偏袒右肩。右膝著地。合掌頂禮。於諸佛前。說是偈言。

| | | |
|-------|-------|-------|
| 我今歸命禮 | 十方一切佛 | 菩薩聲聞眾 |
| 大仙天眼者 | 亦禮菩提心 | 遠離諸惡道 |
| 能得生天上 | 乃至證涅槃 | 若我作少罪 |
| 隨心之所生 | 今對諸佛前 | 懺悔令除滅 |
| 我今身口意 | 所集諸功德 | 願作菩提因 |
| 當成無上道 | 十方國土中 | 供養如來者 |
| 及佛無上智 | 我今盡隨喜 | 有罪悉懺悔 |
| 是福皆隨喜 | 我今禮諸佛 | 願成無上智 |
| 十方大菩薩 | 證於十地者 | 我今稽首禮 |
| 願速證菩提 | 得證菩提已 | 摧伏於魔軍 |
| 轉妙淨法輪 | 饒益眾生類 | 常願住世間 |
| 無量俱胝劫 | 擊於大法鼓 | 度脫苦眾生 |
| 我沒於欲泥 | 貪繩之所繫 | 種種多纏縛 |
| 願佛垂觀察 | 眾生雖垢重 | 諸佛不厭捨 |
| 願以大慈悲 | 度脫生死海 | 現在諸世尊 |
| 過去未來佛 | 所行菩薩道 | 我今願修學 |
| 具足波羅蜜 | 成就六神通 | 度脫諸眾生 |
| 證於無上道 | 了知諸法空 | 無相無自性 |
| 無住無表示 | 不生亦不滅 | 又如大仙尊 |

| | | |
|-------|-------|-------|
| 善了於無我 | 無補特伽羅 | 乃至無壽者 |
| 於諸布施事 | 不執我我所 | 為安樂眾生 |
| 施與無慳悋 | 願我所施物 | 不假功用生 |
| 觀察了知空 | 具施波羅蜜 | 持戒無缺減 |
| 得佛淨尸羅 | 以無所住故 | 具戒波羅蜜 |
| 忍辱如四大 | 不生分別心 | 以無瞋恚故 |
| 具忍波羅蜜 | 願以身心力 | 發起大精進 |
| 堅固無懈怠 | 具勤波羅蜜 | 以如幻如化 |
| 及勇猛精進 | 金剛等三昧 | 具禪波羅蜜 |
| 願證三昧智 | 入於三脫門 | 了三世平等 |
| 具慧波羅蜜 | 諸佛妙色身 | 光明大威德 |
| 菩薩精進行 | 願我皆圓滿 | 彌勒名稱者 |
| 勤修如是行 | 具六波羅蜜 | 安住於十地 |

佛告阿難。彌勒菩薩。安住如是善巧方便。積集無上菩提。阿難。我昔求道。受苦無量。乃能積集無上菩提。

(右二十四頌。初二歸敬頌。第三懺悔頌。第四發願頌。第五隨喜頌。第六以懺悔隨喜禮佛之福迴向無上道頌。第七八請轉法輪頌第九請佛住世頌。第十十一求佛攝受頌。亦四弘誓之前二誓。第十二隨佛學頌。即第三弘誓。第十三成無上道頌。即第四弘誓。第十四法空頌。第十五人空頌。第十六十七檀度頌。先了人法二空。今行施等。方達三輪體空。第十八戒度頌。第十九忍度頌。第二十進度頌。第二十一禪度頌。第二十二慧度頌。第二十三果圓行滿頌。第二十四讚彌勒頌)。

禮佛儀式(終)

音釋

達耆(亦作陀舍)那[合*牛](二合)烏[合*牛](二合成唵音)娑囉婆 二合。或作薩婆。婆字去聲。陀羅尼集經云。誦三徧。頂禮一拜。如是三度禮者。除滅一切十惡五逆四重等罪。一切障難。皆悉消滅。勝人禮拜十萬億佛功德。此名那謨悉羯囉呪。華言禮拜呪。

頭陀 亦云杜多。華言抖擻。謂行十二事。即抖擻三界煩惱矣。

三災 大三災。火。水。風。則世界壞矣。小三災。刀兵。饑饉。疾疫。

八難 一地獄。二畜生。三餓鬼。四無想天。不得見佛聞法。五北俱盧州。不得見佛聞法。六盲聾瘖瘂。七世智辯聰。世人邪智聰利。耽習外書。不信出世正法。八生在佛前佛後。由業重緣薄。不遇佛出世。聞佛說法。

大仙 佛為聖中聖。天中天。仙中仙。故云大覺金仙。

涅槃 華言圓寂。謂德無不備名圓。障無不盡名寂。舊云不生不滅。

補特伽羅 華言數取趣。即有情之別稱。謂諸眾生數數往來趣向六道中受生也。

六趣 即六道。一天。二人。三修羅。四地獄。五餓鬼。六畜生。
波羅蜜 華言到彼岸。謂修此六法。自度度他。到涅槃岸。故亦名六度。
尸羅 華言清涼。謂持戒能除煩惱。而得清涼也。
三昧 華言正定。有百千三昧。至等覺地。入金剛三昧。斷最後微細無明。方證佛地。
三脫門 即三解脫門。一空。二無相。三無願。